

# SMK Taman Tuanku Jaafar bakal jadi sekolah angkat USIM

**SEREMBAN 18 Nov.** - Sekolah Menengah Kebangsaan (SMK) Taman Tuanku Jaafar dipilih untuk disenaraikan sebagai sekolah angkat Universiti Sains Islam Malaysia (USIM).

Naib Canselor USIM, Prof. Datuk Dr. Musa Ahmad berkata, insiatif tersebut membolehkan USIM bersama SMK Taman Tuanku Jaafar untuk merangka serta melaksanakan program lebih teratur dan strategik.

"Kita rasa tidak menjadi halangan untuk kita mengambil sekolah ini sebagai sekolah angkat jika dipersetujui sebab itu akan menjadi lebih berstruktur.

"Selain itu, sekolah ini akan dapat mengikuti sebarang program yang dianjurkan serta dapat

menggunakan kemudahan yang ada di USIM," katanya semasa Lawatan Pengurusan USIM ke SMK Taman Tuanku Jaafar, di sini semalam.

Yang turut hadir, Timbalan Naib Canselor (Hal Ehwal Pelajar dan Alumni) USIM, Prof. Datuk Dr. Mohamed Asin Dollah; Pengarah Pusat Hubungan Industri dan Pengkomersialan USIM, Prof. Madya Dr. Awangku Abdul Rahman Awangku Yussuf, Pengarah Tahmudi USIM, Dr. Nurlida Basir dan Guru Penolong Kanan Akademik Sekolah Menengah Kebangsaan Taman Tuanku Jaafar, Akashah Ismail.

Jelas Musa, budaya yang dipraktikkan di SMK Taman Tuanku Jaafar adalah amat sinonim de-

ngan USIM dan dapat dilihat permasalahannya.

"Pelibatan serta penganjuran program dalam komuniti yang ditonjolkan SMK Taman Tuanku Jaafar amat memberangsangkan serta perlu dicontohi.

"Di USIM, kita juga aktif di dalam pelibatan komuniti tapi mungkin tidak nampak keakrabbannya dan saya melihat modul berkaitan dengan pelibatan komuniti oleh SMK Taman Tuanku Jaafar ini perlu dipelajari.

"Malah, aspek menanam sikap untuk berwakaf 20 sen seminggu yang dipraktikkan di sini ada juga dipraktikkan di USIM namun bukan kuantiti di lihat tapi penerapan budaya itu di dalam diri pelajar," jelasnya.



**DR. MUSA AHMAD** (kiri) melawat kemudahan di sekitar sekolah bersama Akashah Ismail (dua dari kiri) semasa lawatan melihat penanda aras prasarana Sekolah Menengah Kebangsaan Taman Tuanku Jaafar di sekolah tersebut di Seremban, kelmarin. - UTUSAN/MUHAMMAD ASYRAF AZLAN